



Peranan Wanita dalam Pembangunan Keluarga dari Perspektif *Fi Zilal Al-Quran*

Asyraf Hj Ab Rahman*

Fakulti Pengurusan dan Ekonomi, Universiti Malaysia Terengganu

Wan Ibrahim Wan Ahmad

Kolej Sastera dan Sains, Universiti Utara Malaysia

Zainab Ismail

Fakulti Pengajian Islam, Universiti Kebangsaan Malaysia

*Corresponding author; email: asyraf@umt.edu.my

ABSTRAK

*Wanita mempunyai tanggungjawab yang besar dalam pembentukan dan pembangunan keluarga dan masyarakat Islam. Realiti ini dapat dilihat sejak zaman kebangkitan awal Islam lagi. Peranan yang besar telah dimainkan oleh isteri-isteri Rasulullah (SAW) dan para sahabat dalam menyokong aktiviti dakwah Islamiah telah membawa kepada pembentukan sebuah kerajaan awal Islam di Madinah. Makalah ini mengupas kedudukan dan peranan wanita dalam konteks masyarakat Islam semasa dengan merujuk kepada perbincangan yang diutarakan oleh Sayyid Qutb (1906-1966) dalam *Fi Zilal al-Quran*. Kedudukan wanita generasi awal Islam dan sumbangan mereka, cabaran yang dihadapi, serta bentuk sokongan yang dimainkan oleh wanita dalam pembangunan keluarga dan masyarakat seperti yang dibahaskan melalui *Fi Zilal al-Quran* turut dibincangkan.*

Katakunci: *pembangunan keluarga, masyarakat Islam, dakwah Islamiah, masyarakat Islam semasa*

The Role of Women in Family Development From the Perspective of *Fi Zilal Al-Quran*

ABSTRACT

*Women play a vital role in human society towards the formation and development of Muslim families. This reality could be seen since the emergence of early Islamic era. Significant roles amongst the wives of the Prophet (pbuh) and his companions in supporting the propagation of Islam (Islamic Dawah) have led to the formation of the early Islamic State in Medina. This article intends to highlight the status and the role of women in the context of the Muslim contemporary society by referring to the views of Sayyid Qutb (1906-1966) in his *Fi Zilal al-Quran*. The women's status during the early Muslim generation and their roles and challenges, as well as the contributions of women to the development of Muslim family and society, as reflected in *Fi Zilal al-Quran*, will also be discussed.*

Keywords: *family development, Muslim ummah, propagation of Islam, Muslim contemporary society*

PENGENALAN

Dalam negara yang semakin maju peranan wanita dalam pembangunan negara menjadi semakin penting. Perubahan sosioekonomi yang dialami negara sejak selepas merdeka menjadikan peluang pekerjaan telah terbuka luas untuk wanita. Sebahagian besar wanita sekarang terlibat dalam pelbagai pekerjaan di luar rumah. Peranan mereka tidak lagi terhad di rumah sebagai ibu mahupun isteri tetapi juga dalam pelbagai aktiviti pekerjaan di luar rumah daripada aktiviti ekonomi tidak formal hinggalah kepada bidang professional dan iktisas. Walaupun terdapat banyak tulisan dalam konteks agama yang menganalisis peranan wanita di Malaysia, tetapi kajian saintifik berkaitan persoalan peranan mereka dalam konteks al-Qur'an dan Sunnah Rasul (SAW), khususnya dalam konteks *Fi Zilal al-Quran* masih boleh dikatakan belum ada. Beberapa persoalan berkaitan peranan penduduk ini dalam konteks *Fi Zilal al-Quran* seperti yang telah dianalisis oleh pengarang kitab tersebut masih belum diteroka sepenuhnya. Oleh yang demikian tidak banyak yang dapat diketahui mengenai hakikat peranan wanita seperti yang telah dibahas oleh ulama ini. Sehubungan itu makalah ini bertujuan untuk meneliti persoalan ini dengan meninjau sumbangan Sayyid Qutb melalui pembahasannya dalam kitabnya yang masyhur iaitu *Fi Zilal al-Quran*. Pandangan Sayyid Qutb sebagaimana diutarakan beliau melalui *Fi Zilal al-Quran* akan dibahaskan dengan melihat kerelevanannya dalam konteks masyarakat kontemporari yang semakin goyah nilai kekeluargaan lantaran semakin lunturnya sumbangan serta peranan golongan wanita dalam menyokong kekuatan institusi keluarga.

Wanita mempunyai peranan yang besar dalam sejarah Islam. Sejarah kegemilangan umat Islam telah memperlihatkan betapa golongan wanita mempunyai kedudukan yang begitu mulia lagi penting dalam masyarakat. Wanita dan lelaki adalah sama di mana masing-masing mempunyai tanggungjawab yang perlu disempurnakan di depan Allah baik ianya berkaitan ibadah khusus seperti solat, puasa, zakat, dan haji atau berupa ibadah umum seperti bercakap benar, berbaik sangka dan sebagainya. Hak ini jelas berdasarkan firman Allah yang bermaksud: 'Tidaklah Aku jadikan jin dan manusia (baik lelaki dan wanita), kecuali mereka hanya beribadah kepada-Ku' (Al-Quran, *al-Zariyat*: 56).

Sebelum kedatangan Islam, wanita dipandang cukup hina. Mereka tidak diberi kedudukan yang istimewa dalam keluarga dan masyarakat sepertimana lelaki. Kedatangan Islam telah merubah status dan kedudukan wanita. Islam telah mengangkat tinggi martabat wanita dengan memberi beberapa peranan penting sesuai dengan fizikal dan kekuatan yang ada pada mereka. Wanita muslimah di zaman Rasulullah (SAW) telah memberi sokongan yang tidak berbelah bahagi kepada suami, keluarga dan umat Islam. Saidatuna Khadijah Ummu al Mu'minin adalah merupakan sumber kekuatan bagi Rasulullah (SAW) dalam usaha dakwah Baginda di Makkah di kala baginda didatangi bermacam cabaran dan dugaan dari kaum Quraisy sehingga pada ketikanya baginda dipulau dan hampir dibunuh. Di awal penurunan wahyu, sewaktu Rasulullah (SAW) dalam kegelisahan dan ketakutan, Khadijah berperanan sebagai orang yang telah mententeramkan Baginda. Wanita di zaman Rasulullah (SAW) juga menyertai beberapa peperangan besar sebagai jururawat kepada askar-askar Islam yang cedera, selain memberi dorongan dan semangat. Di rumah, mereka bertindak sebagai pembantu kepada suami dalam urusan rumah tangga.

Jika diteliti perihal penglibatan wanita di dalam bidang pekerjaan pada zaman kebangkitan Islam, wanita dibenarkan bekerja dalam pelbagai bidang di dalam atau di luar rumah dengan syarat pekerjaan tersebut dilakukannya dalam suasana terhormat, sopan, serta senantiasa memelihara agamanya dan menghindari daripada perkara-perkara negatif dari pekerjaan tersebut terhadap diri dan persekitarannya. Dalam bidang perniagaan, nama isteri Rasulullah (SAW) iaitu Khadijah Khuwailid, tercatat sebagai seorang ahli perniagaan yang sangat berjaya. Demikian juga Qilat Ummi Bani Anmar yang pernah datang kepada Rasulullah untuk meminta tunjuk ajar dalam bidang jual-beli. Itulah gambaran betapa sumbangan wanita Islam begitu besar baik dalam keluarga, masyarakat dan juga negara seluruhnya. Bahkan kata-kata hikmah ada berbunyi: Wanita itu tiang negara, wanita itu baik, maka baiklah negara itu, tetapi bila dia rosak, maka rosak pulalah negara itu (Abu Mohd Jibril, 1986).

KAEDAH PENYELIDIKAN

Maklumat untuk makalah ini diperolehi daripada satu penyelidikan kualitatif yang menggunakan pendekatan analisis kandungan. Dalam kajian seperti ini pengkaji menilai dan menganalisis kewujudan makna perkataan, konsep atau ayat yang terdapat dalam teks yang menjadi fokus penyelidikan dan kemudian membentuk tema-tema tertentu yang wujud hasil daripada perkataan, konsep atau ayat tersebut. Penyelidikan menggunakan pendekatan ini ialah penyelidikan yang memanfaatkan bahan penulisan yang sedia ada (bahan arkib) daripada pelbagai sumber. Dalam konteks kajian ini, analisis adalah dilakukan ke atas kitab peninggalan ulama besar Islam, iaitu Sayyid Qutb. Fokus penyelidikan ialah ke atas peranan wanita. Untuk menuju kepada pembahasan peranan wanita, proses penulisan bermula dengan pemilihan kitab yang membahaskan persoalan peranan wanita dari perspektif Islam. Untuk tujuan ini, secara *purposive*, kitab yang dipilih ialah *Fi Zilal al-Quran*, sebuah kitab yang disusun oleh Sayyid Qutb. Proses pengumpulan data dilakukan dengan membaca secara teliti isi kandungan kitab *Fi Zilal al-Quran* dan tema pembahasan berkaitan dengan peranan wanita dicatat. Daripada tema ini, analisis dan pembahasan mengenainya dilakukan dengan menjadikan tema yang dikenalpasti tersebut sebagai sub tajuk dalam pembahasan makalah ini. Dalam pembahasan penulisan, tema yang dikenalpasti turut disokong dengan pendapat beberapa tokoh lain yang berkaitan serta pendapat Sayyid Qutb sendiri dalam kitab-kitab yang lain.

Pemilihan kitab *Fi Zilal al-Quran* ini dilakukan kerana ia adalah dianggap antara karya Sayyid Qutb yang teragung dan paling menonjol serta dibaca dan diterjemahkan ke dalam pelbagai bahasa termasuk Bahasa Melayu. *Fi Zilal al-Quran* mula ditulis pada pertengahan 1951 dan hampir siap sepenuhnya apabila penulis beliau dihukum gantung pada tahun 1966. Tema perbincangan dalam *Fi Zilal al-Quran* merangkumi pelbagai aspek baik berkaitan politik, sosioekonomi, pembangunan insan dan pembentukan keluarga dan masyarakat Islam (*al-mujtama' al-islami*). Selain isu-isu berkaitan kemelut yang melanda umat Islam khususnya tekanan dari Barat juga turut dibahas. Tema-tema tersebut dibahas dalam konteks kerelevanannya dengan apa yang telah disebut dalam al-Quran dan Sunnah Rasulullah (SAW). Isu berkaitan sistem kekeluargaan dan peranan wanita yang menjadi fokus perbincangan *Fi Zilal al-Quran* dibahas berasaskan pentafsiran surah-surah seperti *an-Nisa'*, *an-Nahl*, *al-Ahzab* dan seumpamanya.

Perbincangan Sayyid Qutb berkaitan isu wanita dan sumbangannya adalah berdasarkan pengalaman beliau sendiri sewaktu kecil dibesarkan dalam keluarga yang cukup taat kepada ajaran agama. Ibu beliau Fatimah, adalah merupakan sumber inspirasi yang banyak mengorbankan masa demi membentuk keperibadian anak-anaknya dengan asuhan agama dan menghafaz ayat-ayat suci al-Quran. Pengorbanan tersebut telah dirakamkan oleh Sayyid Qutb dalam buku beliau *al-Taswir al-Fanni fi al-Quran*:

Engkau mengharapkan agar Allah memberi kemudahan kepadaku untuk menghafal al-Quran, selain Dia memberi kelebihan kepadaku dengan nada suara yang baik (hafalan tersebut) agar aku mampu memperdengarkan bacaan al-Quran setiap kali engkau ingin mendengarnya. Kemudian engkau telah membuatkan aku memilih jalan baru ini setelah sebahagian dari cita-citamu telah dimakbulkan dan (akhirnya) aku telah mampu menghafaz al-Quran (seluruhnya) (Sayyid Qutb, 1994).

HASIL KAJIAN DAN PERBINCANGAN

Objektif makalah ini ialah untuk meneroka wacana mengenai peranan wanita seperti yang dihuraikan oleh Sayyid Qutb dalam kitabnya *Fi Zilal al-Quran*. Wacana dalam perkara ini dirasakan penting kerana ia boleh meningkatkan kefahaman umum, khususnya masyarakat Islam tentang peranan wanita dalam pembangunan negara. Berasaskan analisis temubual kumpulan fokus, terdapat empat tema yang ditonjolkan oleh Sayyid Qutb berkaitan peranan wanita dalam pembangunan negara. Tema itu ialah: (1)

kekuatan lelaki dan kemuliaan wanita, (2) keperluan kehidupan berkeluarga, (3) ketaatan asas kesolehan wanita, dan (4) pengorbanan wanita dalam kehidupan berkeluarga. Oleh yang demikian perbincangan dalam makalah ini berikut ini ditumpukan kepada aspek-aspek kekuatan lelaki dan kemuliaan wanita, keperluan kehidupan berkeluarga, ketaatan asas kesolehan wanita, dan pengorbanan wanita dalam kehidupan berkeluarga. Penemuan kajian mengenai peranan wanita dalam makalah ini dibincangkan berasaskan tema ini.

Kekuatan lelaki dan kemuliaan wanita

Dalam Quran terdapat banyak ayat-ayat yang memperincikan kekuatan dan kelebihan umat manusia baik lelaki maupun wanita di sisi syara'. Dalam Surah an-Nisa 34-35 umpamanya, Allah SWT telah menjelaskan betapa lelaki adalah ketua bagi kaum wanita dengan kelebihan-kelebihan tertentu yang dikurniakan Allah sebagaimana firmanNya: 'Kaum laki-laki itu adalah pemimpin bagi kaum wanita, oleh kerana Allah telah melebihkan sebahagian mereka (laki-laki) atas sebahagian yang lain (wanita), dan kerana mereka (laki-laki) telah menafkahkan sebahagian daripada harta mereka.' (Al-Quran, *an-Nisa*:34).

Dalam mentafsirkan ayat ini, Sayyid Qutb berpandangan bahawa kekuatan lelaki dalam hal ini secara umumnya, ada hubungkait dengan fitrah kejadian mereka yang dikurniakan dengan beberapa kelebihan seperti memiliki sifat penyabar, berfikiran dalam lagi jauh sebelum bertindak, selain kelebihan berupa kekuatan fizikal serta keupayaan menanggung sebarang bentuk tekanan-tekanan samada dari kalangan ahli keluarga atau masyarakat luar. Ciri-ciri ini dilihat begitu penting bagi seorang pemimpin samada diperingkat kepimpinan ahli keluarga, anak-anak di bawah tanggungan hingga ke peringkat pembuatan keputusan dalam masyarakat dan negara. Sebarang kesilapan terhadap sesuatu keputusan yang dibuat bakal mengundang padah sepertimana dalam urusan berkaitan peperangan dan sebagainya (Sayyid Qutb, 1995).

Kekuatan lelaki dalam konteks ini tidak pula menafikan sama sekali peranan dan kemuliaan wanita Islam. Sesungguhnya, wanita dan lelaki saling perlu memerlukan antara satu sama lain ke arah pembentukan kesatuan yang jitu sepertimana wujudnya pergantungan sesama makhluk Allah; antara langit dan bumi, tumbuhan dan binatang, manusia dan seluruh alam. Wanita bukanlah diciptakan semata-mata untuk keseronokan golongan lelaki. Malah mereka merupakan golongan yang mulia lantaran pengorbanan yang dipikul oleh mereka yang tidak mungkin mampu ditanggung oleh lelaki. Ini dapat dilihat dari segi beberapa sudut yang sesuai dengan fitrah kejadian mereka seperti kesediaan mengandungkan bayi selama sembilan bulan tanpa jemu dan takut dengan kemungkinan bahaya yang ditanggung, menjaga dan menyusukan anak-anak, selain berusaha menjaga perasaan dan hubungan hidup suami-isteri.

Dalam hal ini, ciri-ciri seperti cepat bertindak, perasaan kasihan belas yang tinggi dalam memenuhi keperluan dan kemaslahatan anak-anak, amat sesuai dengan mereka ke arah pembentukan keluarga yang utuh dan harmoni. Sifat-sifat sebegini menurut Sayyid Qutb amat susah lagi mencabar dan tidak mampu ditanggung oleh golongan lelaki. Inilah keadilan Allah yang mengetahui peranan setiap makhluk ciptaanNya sebagai khalifah dimuka bumi ini (Sayyid Qutb, 1995).

Keperluan kehidupan berkeluarga

Kehidupan berkeluarga merupakan keperluan fitrah semulajadi manusia. Justeru itu konsep perkahwinan yang digalakkan oleh Islam adalah sesuai dengan keperluan fitrah tadi yang saling perlu memerlukan antara lelaki dan wanita. Dalam konteks kehidupan berkeluarga, pembentukan institusi kekeluargaan melalui perkahwinan itu mempunyai peranan yang cukup besar dan bukan sekadar memenuhi keperluan nafsu shahwat semata-mata. Ini adalah kerana keluarga itu adalah ibarat blok binaan (*building blocks*) kepada keutuhan institusi masyarakat. Keruntuhan institusi keluarga bermakna kehancuran kepada institusi masyarakat dan negara.

Sayyid Qutb membahaskan secara panjang lebar berkaitan isu ini. Beliau berpendapat bahawa pembinaan keluarga melalui perkahwinan itu adalah satu proses pengagihan tugas secara adil antara suami dan isteri ke arah melahirkan ahli masyarakat yang mampu menyumbang kepada survival agama dan masyarakat kelak. Perkahwinan bukanlah demi memenuhi keperluan syahwat semata-mata (Sayyid Qutb, 1995). Oleh itu pengagihan tanggungjawab serta tugas secara adil seperti meletakkan tanggungjawab kepimpinan dan pencarian nafkah di bahu suami dan pendidikan dan penjagaan anak-anak secara bersama antara suami-isteri adalah satu pendekatan yang baik.

Pengagihan tugas yang adil ini akan melahirkan keharmonian dalam keluarga dan pembesaran anak-anak berlaku secara sempurna lagi selaras dengan hakikat asal kejadian lelaki dan wanita itu sendiri. Malahan pembentukan keperibadian manusia dan proses pentarbiyahan mereka memakan masa yang lama dan tidak seperti pembesaran haiwan yang berakhir dengan bertemu pasangan dan beranak pinak. Pembentukan manusia bermula dengan penekanan nilai kerohanian seawal bayi dalam kandungan, sesudah itu pentarbiyahan akhlak Islam, tunjuk ajar yang betul tentang kehidupan bermasyarakat dan hak-hak dan tanggungjawab yang perlu dimainkan adalah penting ke arah mencapai keredhaan Ilahi (Sayyid Qutb, 1995). Ibu adalah berperanan besar bermula dengan penyusuan bayi pada peringkat dua tahun pertama, diikuti dengan belaian dan kasih sayang yang berterusan (Sayyid Qutb, 1995).

Sebaliknya, sesebuah institusi keluarga yang didasari keperluan kepuasan seksual, cinta yang buta akan mengundang keruntuhan ketamadunan umat seluruhnya kerana perasaan tanggungjawab dan amanah baik di pihak suami atau isteri telah diketepikan. Menurut Sayyid Qutb, bilamana seorang isteri melihat keperluan material seperti gaji yang mahal, pekerjaan yang mampu menghasilkan wang yang banyak lebih baik dari mengorbankan masa menumpu dan membesarkan anak-anak yang solih, maka tunggulah kehancuran institusi kekeluargaan dan masyarakat tersebut.

Senario yang berlaku di negara-negara maju seperti Perancis, Rusia dan beberapa negara Eropah jelas memperlihatkan berlakunya penyimpangan ini (Sayyid Qutb, 1995). Pandangan ini turut dikongsi oleh Yusuf al-Qardawi (1993) apabila beliau melihat persekitaran yang berlaku di Barat amat jauh bezanya dengan ajaran Islam. Ini kerana wanita di Barat telah diabaikan hak mereka dalam banyak aspek, baik berupa material, dan keperluan hidup. Oleh itu, mereka bekerja adalah atas dasar keperluan mendesak bagi menyara kehidupan dan bukan lagi pilihan. Tanpa bekerja mereka mungkin akan terpinggir dan mati kelaparan kerana kurang diberi bantuan sama ada dari saudara lelaki, ibu bapa maupun keluarga.

Kecenderungan Sayyid Qutb yang cuba meletakkan kedudukan wanita di tempat yang sewajar perlu dilihat secara positif dalam konteks pembentukan keluarga dan masyarakat yang utuh. Walaupun dari satu sudut, seolah-olah wanita hanya berada di rumah, namun perlu diingat bahawa wanita turut berperanan diluar rumah asalkan pekerjaan tersebut sesuai dengan status mereka yang perlu dipelihara agar tidak menimbulkan sebarang fitnah dan sebagainya. Kalau dilihat dari sudut perjuangan gerakan Ikhwan al-Muslimun di Mesir di era 1960-an, maka didapati bahawa terdapat para wanita yang turut serta membantu gerakan dalam menyampaikan dakwah Islam termasuk saudara perempuan Sayyid Qutb iaitu, Aminah dan Hamidah. Kedua-duanya turut terlibat secara aktif bersama Sayyid Qutb baik dalam penulisan dan penyampaian ceramah kepada tahap pengislahan masyarakat Mesir pada ketika itu (Salah Abd al-Fattah al-Khalidi, 1985).

Pendekatan positif Sayyid Qutb terhadap wanita ini turut diakui oleh Sarjana Yahudi, Haim (1982) yang mengupas buku Sayyid Qutb, *al-Madinah al-Mansyurah* yang mengisahkan seorang wanita bernama Shehrizat yang secara berani meminta keizinan dari raja dari menjalankan tugas di istana atas alasan ingin menumpukan perhatian membesarkan anak-anaknya: Saya memohon ingin kembali kepada tiga orang anak-anak saya, membesarkan mereka agar mereka menjadi golongan yang berguna kepada orang tua. Saya tidak lagi sanggup Tuan untuk selamanya bergantung kepada urusan kerja pentadbiran (di istana) (Haim, 1982). Keinginan yang ditunjukkan oleh wanita tersebut lahir dari hati nurani kewanitaan

yang telah dianugerahkan Allah kepadanya secara fitrah. Manakala kebergantungan anak-anak kepada ibu mereka lebih dari yang lain juga adalah secara semulajadi sebagaimana telah ditetapkan oleh Allah.

Penyelewengan matlamat pembentukan keluarga sepertimana banyak berlaku di negara-negara maju (Barat umpamanya) jelas membuktikan ketempangan budaya yang mereka ikuti. Masyarakat Jahili sebagaimana dilebelkan oleh Sayyid Qutb ini, tidak lagi mampu membezakan antara keperluan kemanusiaan dan dorongan nafsu 'kebinatangan'. Justeru itu pergaulan bebas lelaki dan wanita tanpa ikatan perkahwinan, dan perzinaan tidak lagi dianggap pelik atau menyalahi pandangan hidup ahli masyarakat. Bahkan, ia telah dianggap sah dan merupakan satu tarikan atau sumber pendapatan bagi negara (Sayyid Qutb, 1995).

Qutb mengambil contoh pasangan yang tidak berkahwin di Rusia di sekitar 1960an sepertimana berikut; lelaki mula meniduri wanita seawal usia 18 tahun. Manakala wanita pula pada usia 15 tahun. Sebanyak 95% daripada remaja lelaki telah melakukan hubungan jenis pada usia 21 tahun (Sayyid Qutb, 1995). Senario ini jika dilihat dalam konteks hari ini, maka jumlahnya adalah jauh lebih tinggi memandangkan semakin kurangnya penekanan aspek agama dalam kehidupan masyarakat selain kemasukan budaya songsang yang semakin rancak atas nama globalisasi dan modernisasi yang digembar-gemburkan selama ini.

Ketaatan asas kesolehan wanita

Sayyid Qutb menggariskan beberapa kewajipan yang perlu bagi wanita terhadap suaminya iaitu ketaatan, menjaga kehormatan diri, harta dan anak-anak sewaktu ketiadaan suami sesuai dengan gesaan al-Quran yang telah menggariskan beberapa kewajipan-kewajipan tertentu bagi setiap lelaki dan wanita. Kewajipan yang paling asas bagi wanita ialah mentaati suami dalam semua urusan keluarga kecuali pada perkara yang dilarang agama seperti arahan meminum arak, melakukan zina dengan lelaki lain (pelacuran), mencuri dan sebagainya. Sifat ketaatan ini menurut Sayyid Qutb perlu lahir atas rasa cinta yang mendalam dan kasih sayang kepada suami dan ahli keluarga dan bukan kerana keperluan kepada material atau dipaksa.

Selain itu suami perlu sentiasa memberi didikan agama dan nasihat kepada ahli keluarga agar keharmonian yang dibentuk dapat dikekalkan sesuai dengan ayat al-Quran (Al-Quran, *al-Tahrim*: 6) berbunyi: 'Jagalah diri kamu dan ahli keluarga kamu dari api neraka...'. Menjadi tanggungjawab suami untuk memantau tindak-tanduk isterinya. Beberapa kaedah dalam berhadapan dengan isteri yang derhaka turut digariskan oleh al-Quran seperti memberi nasihat dan teguran yang baik, mengasingkan dari tempat tidur dan memukul sekadar mendidik. Pendekatan sebegini menurut Sayyid Qutb adalah penting diambil tindakan segera oleh pihak suami sebelum rumah tangga menjadi semakin goyah dan binasa (Sayyid Qutb, 1995).

Kebenaran agama yang membolehkan lelaki memukul isteri dalam keadaan tertentu pada pandangan Sayyid Qutb adalah sesuai dengan syarat pukulan itu sekadar mendidik dan bukan bagi menyakiti si isteri, ibarat pukulan lembut dari seorang pendidik yang menyayangi, ibarat pukulan seorang ayah kepada anaknya atau pukulan guru terhadap murid yang dikasihinya (Sayyid Qutb, 1995). Pendekatan sebegini walau bagaimanapun adalah sama sekali tidak perlu sekiranya kedua belah pihak masih mampu mencari jalan penyelesaian yang lebih baik dan saling wujud pemuafakatan (Sayyid Qutb, 1995).

Ketaatan juga merupakan gambaran kesolehan wanita di sisi agama. Ini adalah kerana sifat taat setia yang ditunjukkan menggambarkan tahap keimanan dan ketaqwaan mereka kepada Allah. Ketaatan yang dibuktikan dengan mengenyahkan dorongan nafsu dan keseronokan duniawi di luar rumah demi membentuk keperibadian ahli keluarga selain mencari keredaan Allah dianggap satu pengorbanan yang cukup besar bagi wanita. Kerana itu adalah adil apabila Islam mewajibkan lelaki keluar berjihad apabila

ada keperluan manakala wanita diberi pilihan berbuat demikian dengan harapan mereka dapat mendidik anak-anak dengan baik agar dapat membina satu generasi umat Islam yang mampu mengikuti jejak langkah bapa mereka kelak (Sayyid Qutb, 1995).

Keutamaan menjaga keperluan ahli keluarga dan anak-anak bukanlah menafikan sama sekali hak wanita untuk keluar rumah. Sebaliknya, apa yang ditekan ialah dari sudut kesesuaian fitrah kejadian wanita yang dilihat lebih relevan berbanding lelaki dalam mengurus keperluan dan pembesaran anak-anak di rumah disamping bantuan para suami. Selain itu, keperluan ini juga adalah bagi menjaga kehormatan dan kemuliaan wanita itu sendiri. Sayyid Qutb mengakui hakikat ini dengan menegaskan bahawa kelonggaran yang dibenarkan oleh agama bagi wanita untuk keluar dari rumah adalah atas sebab keperluan dan hajat yang mendesak. Dalam konteks ini, bekerja demi menjaga anak-anak yang ketiadaan bapa adalah termasuk dalam keperluan mendesak, selain membantu para suami yang tidak lagi mampu bekerja kerana kecacatan yang dialami dan sebagainya.

Wanita di zaman Rasulullah (SAW) umpamanya, tidak ditegah untuk mereka keluar menunaikan solat berjamaah dan mendengar pengajaran Baginda (SAW) di masjid. Mereka keluar beramai-ramai dalam keadaan menutup kepala mereka sehingga tidak dikenali oleh kebanyakan orang dan tidak pula menimbulkan sebarang fitnah. Berdandan dan berhias adalah jauh sama sekali demi menjaga kehormatan dan martabat yang ada pada mereka. Inilah gambaran kesolehan wanita sepertimana ayat al-Quran yang bermaksud: Maka wanita yang solih itu adalah terdiri dari mereka yang taat lagi patuh (kepada Allah dan kepada suami-suami mereka) dan memelihara diri di waktu ketiadaan suami (Al-Quran, *an-Nisa*: 34).

Pengorbanan wanita dalam kehidupan berkeluarga

Keutuhan institusi keluarga adalah umpama keutuhan batu-bata yang menampung kekuatan institusi masyarakat. Justeru itu suami dan isteri perlu berusaha mengekalkan persefahaman dan muafakat dalam menjaga hubungan mereka, serta hubungan dengan anak-anak mereka. Pengorbanan si suami, melayan kerenah isteri dan anak-anak, keluar mencari rezeki bagi menampung keperluan keluarga, adalah sesuatu yang tinggi nilainya di sisi agama. Begitu juga pengorbanan isteri memelihara kehormatan diri, mentaati dan menjaga keperluan suami, membesarkan anak-anak, dan memelihara aurat adalah termasuk dalam amalan kebaikan yang disanjung tinggi.

Menurut Sayyid Qutb, setiap pengorbanan yang dibuat mengandungi hikmah-hikmah tertentu. Beliau mengambil contoh kisah yang berlaku di zaman Rasulullah (SAW) bilamana kewajipan menutup aurat wanita mula dilaksanakan (Al-Quran, *al-Ahzab*: 59). Telah menjadi kebiasaan bagi penduduk Madinah waktu itu untuk keluar membuang air di luar rumah di waktu malam. Keadaan ini telah digunakan oleh orang-orang jahat untuk mengacau dan mengusik khususnya di kalangan wanita Muslimah. Namun apabila mereka terserempak dengan wanita muslimah yang memakai jilbab, lalu dijauhi kerana disangka mereka dari golongan yang berstatus tinggi lagi dihormati. Manakala mereka terserempak dengan wanita yang tanpa berjilbab lalu terus dikacau kerana menyangka wanita tersebut adalah terdiri dari golongan hamba yang tidak mempunyai maruah dan kemuliaan ketika itu (Sayyid Qutb, 1995). Inilah antara hikmah besar atas setiap suruhan Allah yang hanya mampu difahami oleh mereka yang beriman dan bertakwa.

PENUTUP

Sebagai kesimpulannya dapat dikatakan wanita mempunyai peranan besar dalam pembangunan keluarga, masyarakat dan negara. Agama Islam mengiktiraf peranan kaum wanita ini. Mereka diberikan ruang dan peluang untuk aktif dalam pembangunan seiring dengan kaum lelaki. Pendekatan yang ditunjukkan oleh Sayyid Qutb dalam membincangkan isu wanita cukup relevan berasaskan pengalaman dan pemerhatian

langsung beliau sendiri terutama dalam suasana keluarga beliau di mana ibu dilihat banyak mempengaruhi tingkah laku dan pemikiran anak-anak. Selain itu persepsi positif beliau terhadap wanita juga dipengaruhi faktor pengamatan yang dilakukan oleh beliau sewaktu di Amerika di mana punca keruntuhan rumah tangga dan kepincangan sistem kekeluargaan turut berpunca dari hilangnya peranan wanita dalam keluarga. Justeru itu beliau melihat wanita berperanan besar dalam mengembalikan semula kecemerlangan keluarga dan umat Islam. Pengagihan tugas secara adil antara suami-isteri yang didasari aqidah Islamiyyah yang jelas adalah penting dan didokong dengan kesesuaian bidang tugas selari dengan keadaan fizikal mereka.

Walaupun pendekatan Sayyid Qutb dilihat mengenyahkan kebebasan wanita, namun ini bukan bererti wanita kehilangan hak sama sekali untuk keluar bekerja atau bersosial. Apa yang ditekankan adalah dari sudut mencari formula yang sesuai ke arah membentuk generasi umat yang cemerlang jasmani, emosi, rohani dan intelek. Dalam hal ini, beliau melihat peranan yang dimainkan wanita di rumah boleh merealisasikan kecemerlangan tersebut kerana ia lebih serasi dengan kejadian wanita itu sendiri yang mempunyai sifat lemah-lembut, penyayang dan mudah bertolak ansur dalam banyak perkara. Dalam konteks masa kini, keperluan kehidupan yang semakin mendesak telah mendorong ramai wanita untuk keluar bekerja dan mencari rezeki bagi menambah pendapatan keluarga. Namun berdasarkan pengamatan sejarah wanita Islam dan pandangan Sayyid Qutb, adalah lebih baik sekiranya keperluan tersebut dilihat dari sudut kemaslahatan yang diperolehi kepada diri, keluarga dan umat Islam. Di sini pemilihan kerja yang sesuai dengan fitrah dan keupayaan wanita adalah lebih penting berbanding mengejar kedudukan dan kebendaan agar ia memberi impak yang lebih baik kepada diri, keluarga dan masyarakat umumnya, selain berupaya memelihara hak dan tanggungjawab sebagai isteri, dan ibu di rumah. Ini adalah kerana peranan sebagai isteri dan pendidik di rumah itulah yang lebih utama dan bakal diambil kira oleh agama kelak.

RUJUKAN

Al-Quran

- Abu Mohd Jibril Abdur Rahman. (1986). *Wanita solihah: Ciri-ciri dan fungsinya*. Kuala Lumpur: Pustaka Syuhada.
- Haim, Sylvia G. (1982). Sayyid Qutb. *Asian and African Studies*. 16, 147-156.
- Salah Abd al-Fattah al-Khalidi. (1985). *Sayyid Qutb: al-Shahid al-Hayyi*. Amman: Maktabah al-Aqsa.
- Sayyid, Qutb. (1995). *Fi zilal al-Quran*. Kaherah: Dar al-Shuruq.
- (1994). *al-Taswir al-fanni fi al-Quran*. Kaherah: Dar al-Maarif.
- Yusuf al-Qardawi. (1993). *Muslimah al-ghadd*. Kaherah: dar al-Wafa'.